

Majikan terpaksa tanggung kos tiga kali ganda

Pecat pekerja sengaja beli MC



PIHAK majikan digesa supaya mengambil tindakan tegas termasuk memecat pekerja mereka yang sengaja membeli MC kerana 'malas' bekerja pada hari berkenaan.

"Dalam perkara ini, para majikan digesa supaya mengambil tindakan disiplin terhadap pekerja yang didapati melakukan penipuan tersebut dengan memecat mereka tanpa perlu merujuk kepada Mahkamah Perusahaan," kata Pengarah Eksekutif Persekutuan Majikan-majikan Malaysia (MEF), Shamsuddin Bardan ketika dihubungi *KOSMO!* Ahad baru-baru ini.

Selain itu, pihak berwajib seperti persatuan yang menaungi pusat-pusat perubatan dan pengamal perubatan di negara ini harus mengambil tindakan terhadap ahlinya yang terlibat dalam gejala tidak sihat itu.

"Ini termasuklah menggantung perkhidmatan seseorang doktor dan juga menggantung lesen sesebuah klinik



SHAMSUDDIN

yang didapati bersubahat dalam menjual sijil MC kepada individu.

"Kerajaan pula harus mengambil tindakan dengan mendakwa mereka di mahkamah kerana telah melanggar

etika industri itu," katanya.

Shamsuddin turut mengutuk tindakan menjual dan membeli MC itu sambil menyifatkan perbuatan itu sebagai tidak menguntungkan sesiapa, malah akan menyebabkan majikan terpaksa menanggung kerugian sebanyak tiga kali ganda.

"Kami telah membuat kajian mengenai isu ini. Sekiranya seseorang pekerja didapati menipu dengan membeli MC, maka pihak majikan terpaksa menanggung lebihan kos.

"Ini termasuklah terpaksa membayar gaji pekerja yang telah cuti (mendapat MC), menanggung kos perubatan 'pesakit' tersebut dan membayar upah lebih masa kepada pekerja lain yang menggantikan tempatnya," jelasnya.

Menurut Shamsuddin, sekarang ini sebahagian daripada majikan telah mengambil langkah dengan melantik klinik-klinik panel untuk syarikat mereka dan hanya akan menerima MC yang dikeluarkan klinik panel berkenaan sahaja.

"Langkah itu merupakan langkah bijak bagi membendung gejala penipuan MC terutama di kalangan pekerja," katanya.